



"Austeridad a resulta un disaster absoluto"

Ganador di Premio Nobel den Economia profesor Stiglitz ta apoya e idea di inverti den bo pais y bo hendenan

WASHINGTON/ORANJESTAD

- Durante nan biahe pa Merca pa participa n'e cumbre riba energia inicia pa Vice Presidente di Merca Joe Biden, Prome Minister Mike Eman y Mike de Meza a haci un bihsita tambe na Columbia University. Eynan nan a papia cu e erudita, profesor den Economia Joseph Stiglitz, kende ta duna les den economia y comercio.

Stiglitz tabata tambe un consehero di Presidente Mericano Bill Clinton y economista principal di Banco Mundial. Dor di e background ey e profesor a wordo involvi grandemente den conseha paisnan riba tereno economico.

Profesor Stiglitz a bisa cu el a haya e encuentro cu Prome Minister di Aruba, Eman uno masha interesante sigur pa loke Eman a compromete su mes na ne. "Nos a papia riba varios tereno cu mi tabata involvi den nan. P.e. kico tur un economia cu ta funciona bon ta encera."

Stiglitz a bisa cu progreso social no kiermen cu bienestar ta wordo midi na ne. E no ta wordo midi manera mester ta dor di GDP y pesey cu e ta contento cu Eman ta pensa riba cierto asunto den un contexto mas amplio.

Eprofesor ta haya cu semper mester tene cuenta cu dos aspecto, na di prome lugar percura cu e prosperidad ta wordo comparti, cu e beneficianan ta wordo comparti den sociedad y na di dos lugar sostibilidad.

Con percura p'e crecimiento cu bo tin ta sostenibel. "E ultimo aki ta trece bek un di e preocupacionnan

cu mi tin pa hopi tempo caba. Con pa tin crecimiento medio ambiental sostenibel. Un aspecto particular di esaki ta energia."Profesor Stiglitz a bisa cu ta esencial pa tuma bentaha di naturalesa sin dafia medio ambiente.

E di tres topico cu el a papia cu Prome Minister Eman riba dje ta di su ultimo buki, titula 'Creating a learning society'. E profesor a bisa cu Eman tabata hopi interesa den e ideanan den e buki.

"Con move pa crea un sociedad cu ta siñando y con Aruba por logra esaki. E hub entre Latino America, Norte America y Europa den provee conocimiento, un niche den e espacio di conocimiento ta un ehempel."

Aruba tin ambicionnan grandi, Stiglitz a bisa. Ta traha duro den realisa nan y den e combersacion conjunto a papia unda y con e profesor por duna su aporte.

Un tema cu a bin dilanti ta cu ora e crisis a presenta su mes na

2008, diferente pais a trata esaki den diferente forma. Tabatin un division den mundo, pasobra tabatin dos filosofia economico. "Un di nan yama austeridad y e otro tabata inversion den bo hendenan y pais. Mi ta kere firme cu e politica di austeridad lo no funciona y cu e politica di inversion t'e base di crecimiento sostenibel. Shete aña despues di e crisis nos ta mira e resultadonan di e dos teorlanan aki. Austeridad a resulta di ta un disaster absoluto. Grecia ta un ehempel di esey. Un desempleo haltisimo y un GDP cu ta bahando mas y mas. E contraste cu paisnan cu a haci inversion manera Aruba cu a inverti den su hendenan por

mira economianan fuerte na unda no tin desempleo. E debe a subi, pero tin algo pa muestra cu e debe aki no a subi

sin mas. Tabatin inversion den hende y den e pais. Si mira esaki for di e punto di salida aki e pais a bira mas rico y ta bayendo miho".

Stiglitz a bisa di a keda masha contento cu Mike Eman a scoge p'e strategia aki. El a bisa di lo bin bishita Aruba, un isla cu el a tende hopi di dje di su amigonan cu a yega di bishita Aruba.

Joseph Eugene Stiglitz, ForMemRS, FBA ta un economista Mericano y un profesor na Columbia University. El a ricibi e Nobel Memorial Prize den Ciencia Economico y e John Bates Clark Medal. Un persona di caliber halto.

